

0.0.1 aggappasādasuttam

1. cattāro'me bhikkhave aggappasādā. katame cattāro?

2. yāvatā bhikkhave sattā apadā vā dipadā vā catuppadā vā bahuppadā vā rūpino vā arūpino vā saññino vā asaññino vā nevasaññināsaññino vā, tathāgato tesam aggamakkhāyati araham sammāsambuddho. ye bhikkhave buddhe pasannā, agge te pasannā, agge kho pana pasannānam aggo vipāko hoti.

3. yāvatā bhikkhave dhammā saṅkhatā, ariyo aṭṭhaṅgiko maggo tesam aggamakkhāyati. ye bhikkhave ariye aṭṭhaṅgike magge pasannā, agge te pasannā. agge kho pana pasannānam aggo vipāko hoti.

4. yāvatā bhikkhave dhammā saṅkhatā vā asaṅkhatā vā, virāgo tesam dhammānam aggamakkhāyati. yadidaṃ madanimmadano pipāsavinayo ālayasamugghāto vaṭṭupacchedo taṇhakkhayo virāgo nirodho nibbānam. ye bhikkhave dhamme pasannā, agge te pasannā. agge kho pana pasannānam aggo vipāko hoti.

5. yāvatā bhikkhave saṅghā vā gaṇā vā, tathāgata-sāvakaṅgho tesam aggamakkhāyati. yadidaṃ cattāri purisayugāni aṭṭhapurisapuggalā esa bhagavato sāvakaṅgho āhuneyyo pāhuneyyo dakkhiṇeyyo añjalikaraṇīyo anuttaram puññakkhetam lokassa. ye

bhikkhave saṅghe pasannā, agge te pasannā. agge kho pana pasannānaṃ aggo vipāko hoti.

6. ime kho bhikkhave cattāro aggappasādāti.

80. aggato ve pasannānaṃ
aggam dhammam vijānataṃ,
agge buddhe pasannānaṃ
dakkhiṇeyye anuttare.

81. agge dhamme pasannānaṃ
virāgūpasame sukhe,
agge saṅghe pasannānaṃ
puññakkhette anuttare.

82. aggasmim dānaṃ dadataṃ
aggam puññaṃ pavaḍḍhati,
aggam āyura ca vaṇṇo ca
yaso kitti sukhaṃ balaṃ.

83. aggassa dātā medhāvī
aggadhammasamāhito,
devabhūto manusso vā
aggappatto pamodatīti.